

*Cantanu tremindui*

U sgiò merri hè statu elettu  
Ci rigaleti u caprettu  
È rampanpan è tralilluler'è  
Rampanpan è tralillulà.

No semu cuntenti  
No semu allegri  
D'avè varantu a mirria  
È rampanpan è tralilluler'è  
Rampanpan è tralillulà

Alzemu lu maghju  
Furmemu la ronda  
È femu l'eviva  
È rampanpan è tralilluleri

Quidda chi faci u mischinu  
Si truverà senza tichjina  
A cosa a più bedda a ghjilusia  
Di a pubell'è rampanpan ...

Feti pur ciò chì vi pari  
Diti pur ciò chì vuleti  
Semu i più forti  
Emu varant'a manghjarìa  
È rampanpan.....

**C :** C'eranu pocu i volta casacca.  
Bastaia à vultà l'ochja, u lampaianu accantu.  
Ùn si vidi più à Ceccu Mastuca Broddu, si sarà lampatu da a catarazza.

**M :** Si l'aceddu ùn voli senta, rachja puri quantu ti picci. È fri è frù, mancu più una piuma.  
O! l'abruttitu cù i so schinchi fini, issu tambuttu, issu sdinticatu, è à Barritonu ùn la finisci mai di stupà.  
Chì tù stupessi un tizzonu.  
M'affocu, mi veni l'affannu, si tù u senti chirchinnà.  
Oimè, o' amma  
Oimè o' amma.  
Ama chì sè fiddolu di a vita, ùn circà sempri à Cristu è à Santu.  
Avvinghji puri o Barnacà!  
Un ovu aghju sciappatu  
C'era drintu una zinzala  
C'era fattu u so nidu.  
Mai avaria crettu  
Duvintà una frittata.

**C :** Tè ni faraghju una à u me Lisandronu.  
Trè bastaranu,  
O! sciacchetimini un antru, s'iddu si cuntorra à qualchisia, manca à a risa.  
**M :** S'è vo i ciacceti surtindu... ùn sarà più una frittata, sarà una bedda ciacciata.  
**C :** Uh! chì tù mani muzzighja o carnava.  
**M :** È dopu hà à senta l'altru. Chì ti sè mascaratu, sè tutti i ghjorna carnava. O la me



*In scena cù Bernardu.*

sorti. Sò castigata da a mane à a sera.  
M'incresci ancu di falammini in piazza.  
O tinta à mè ciò chì no semu è ciò chì no duvintemu.

**C :** Ùn sò più da nudda. Prima sì...  
Ah ma avali hm! mancu a curnachja ni vulirria.

**M :** È di cussi tù, faristi meddu à richità.

**C :** Richità richitarè tù chì mi piaci à parlacciulà.

**M :** Circaia di ùn struppialla micca.  
Ma chì diavulu sè. Cridaristi essa a sola tù, d'avenni una.

**C :** Furcuta chè tù sè, mancu pinsalla.  
A lingua hè quidda di u populu ùn hè vè ?

**M :** Ah! à i tempi d'oghji quali a sà.

**C :** Ronca s'idda ti pari, ma à mè lasciami cantà (quant'iddu ci n'hè stedi in celu.)  
Lasciu di à qual'dici. Mancu mi vargugnu.  
Fin'à trois possu cuntà. Trè piatta di suppa i pò sempri empia.

Tù chì sè a sapientona, alè! dimmi avali quantu ghjorna ci sò in un'annata.

**M :** Faci cinquant'anni chì i m'abbuchju.

I to cumbricculi i ti lasciu stà.

**C :** Dimmi piutostu ciò chì aghju da fà da manghjà.

**M :** À chì faci u manghjà manghja ùn si poni quistioni.

**C :** Ci pò dà una risposta dinnò tù.

**M :** Ùn t'aghju duman datu nudda.

**C :** Si tù dici nudda ci hè calcosa.

**M :** Calcosa chì ùn dura.

**C :** U tempu ...

**M :** Nivonu.

**C :** Aghju da cripà.

**M :** O! mi lascerà sola.

**C :** Ùn sè po micca sola ùn ci hè u soli?

**M :** Scalda.

**C :** Hè buddenti.

**M :** T'hà à cocia.

**C :** Un ovu?

**M :** Ovu du ghjaddina.

**C :** A si hà manghjata a vulpi.

**M :** Quantu volta tù avali sè andata in vulpaghjola?

**C :** Mai.

**M :** Parchì dici mai.

**C :** È chì ti aghju da dì?

**M :** Iè.

**C :** Ùn ci socu mai andata.

**M :** Iè a socu a mi ai dighjà ditta.

**C :** Socu senza essa.

**M :** Sè o ùn sè, ci voli à sapè?

**C :** È chì voli sapè?

**M :** Sè?

**C :** Sò!

**M :** Sò o sè ?

**C :** Sò è sè.

**M :** Mi perdu in quistu l'affari, zittu vè.

**C :** Parchì voli parlà?

**M :** Hè finita, ùn parlu più à nimu.